



中国经典名著

全宋词

(五)

刘 丰 褚为良 編集

学苑音像出版社

目 录

米友仁.....	员
曾 纘.....	愿
吴则礼	圆
赵子发	圆
徐 俯	圆
王安中	獭
张继先	缘
叶梦得	苑
李 光.....	员
刘一止.....	愿
汪 藻.....	缘
曹 组.....	苑
王庭珪.....	愿
陈 克.....	员
朱敦儒.....	苑
周紫芝.....	圆

米友仁

临江仙

昨夜扁舟沙外舫，淮山微雨初晴。断云飞
过月还明。一天风露重，人在玉壶清。

水际不知何许是，遥林□辨微青。醉迷归
梦强□凌。谁言东去雁，解寄此时情。

小重山

醉倚朱阑一解衣。碧云迷望眼，断虹低。
近来休说带宽围。人千里，还是燕双飞。


深院日初迟。绮窗帘幕静，恨生眉。不堪
虚度是花时。鸿来速，争解寄相思。

减字木兰花

柳塘微雨。两两飞鸥来复去。倚遍重阑。
人在碧云山外山。

一春离怨。日照绮窗长几线。酒病情魔。

— 员 —



两事春来无奈何。

点绛唇

浩渺湖天，酒浮黄菊携佳侣。淡烟疏雨。
去鲁方怀土。

倾盖相逢，引满哦奇语。山围处。兕觥频
举。不醉君无去。

渔家傲

从古荆溪名胜地。溪光万顷琉璃翠。极望
荷花三十里。香喷鼻。我舟日在花间舣。

向晚余霞收散绮。遥山抹黛天如水。满引
一尊明月里。微风起。萧然真在华胥氏。

阮郎归

小舟载酒向平湖。新凉生晓初。乱山烟外
有还无。王维真画图。

风遽起，动襟裾。雨来荷溅珠。一尊相对
喜君俱。醉归红袖扶。

— 圆 —



临江仙

一曲阳关肠断处，临风惨对离尊。红妆揭调十分斟。古来多聚散，正似岭头云。

昨夜晴霄千里月，向人无限多情。娟娟今夜满虚庭。一帆随浪去，却照画船轻。


宴桃源

蝶梦初回栩栩。柳岸几声莺语。萍末起微风，山外一川烟雨。凝顾。凝顾。人在玉壶深处。

南歌子

遇酒词先举，逢山眼暂明。一川风雨纵留人。不道此郎归兴、欲兼程。

客久情深□，寻欢恨不能。绳床顿睡梦纵横。赖□□□□□、□□□。



渔家傲

和晏元献韵

郊外春和宜散步。百花枝上初凝露。福地神仙多外府。藏奇趣。幽寻历遍溪边路。

薄宦浮家无定处。萍飘梗泛前人语。与子未须乡国去。来同住。且看群岫烟中雨。


念奴娇

村居九日

九秋气爽，正溪山雨过，茅檐清暇。篱菊妍英，知是为，佳节重阳开也。色妙香殊，匀浮瓯面，俗状卑金罍。歌狂饮俊，满簪还更盈把。

村外草草杯盘，边尘不动，欲买应无价。端使晴霄风露冷，云卷烟收平野。向晚婵娟，半轮斜照，想见成清夜。玉山颓处，要看敲帽如画。

— 源 —



临江仙

宝晋轩窗临望处，山围水绕林萦。不堪回首到江城。墙趺围瓦砾，鸥鹭见人惊。

日愿太平归旧里，更无余事关情。小营茅舍倚云汀。四时风月里，还我醉腾腾。

阮郎归

碧溪风动满文漪。雨余山更奇。淡烟横处柳行低。鸳鸯来去飞。


人似玉，醉如泥。一枝随鬓欹。夷犹双桨月平西。幽寻归路迷。

临江仙

野外不堪无胜侣，笑谈安得君同。四时景物一壶中。醉余临望处，远岫数重重。

溪上新荷初出水，花房半弄微红。晓风萧爽韵疏松。娟娟明月上，人在广寒宫。

— 缘 —



念奴娇

裁成渊明归去来辞

阑干倚处。戏裁成、彭泽当年奇语。三径荒凉怀旧里，我欲扁舟归去。鸟倦知还，寓形宇内，今已年如许。小窗容膝，要寻情话亲侣。

郭外粗有西畴，故园松菊，日涉方成趣。流水涓涓千涧上，云绕奇峰无数。窈窕经丘，风清月瞭，时看烟中雨。萧然巾岸，引觞寄傲衡宇。

醉春风


一阳来复群阴往。吾道从今长。万事莫关情，月夕风前，依旧须豪放。

卿云舒卷浮青嶂。从古书珍赏。满引唱新词，春意看看，又到梅梢上。

小重山

雨过风来午暑清。榴花红照眼，向人明。

— 远 —



一枝低映宝钗横。菖蒲酒，玉碗十分斟。

引满听新声。小轩帘半卷，远山青。几人
闲处见闲情。醒还醉，为趣妙难名。


诉衷情

渊明诗

结庐人境羡陶潜。车马不来喧。胜处自多
真趣，飞鸟日相还。

心既远，地仍偏。见南山。手持菊颖，山
气常佳，欲辨忘言。

以上见《彊村丛书》本《阳春集》。



曾 纡

念奴娇

片帆暮落，正前村梅蕊，愁人如雪。东陌西溪长记得，疏影横斜时节。六出冰姿，玉人微步，笑里轻轻折。兰房沈醉，暗香曾共私窃。

回头万水千山，一枝重见处，离肠千结。料想临鸾消瘦损，时把啼红偷浥。怎得伊来，许多幽恨，共捻青梢说。如今千里，断魂空对明月。

上林春

东苑梅繁，豪健放乐，醉倒花前狂客。靓妆微步，攀条弄粉，凌波遍寻青陌。暗香堕靥。更飘近、雾鬟蝉额。倒金荷、念流光易失，幽姿堪惜。

惜花心、未甘鬓白。南枝上、又见寻芳消息。旧游回首，前欢如梦，谁知等闲抛掷。稠红乱蕊，漫开遍、楚江南北。独销魂，念谁寄、

— 愿 —



故园春色。

秋霁

木落山明，暮江碧，楼倚太虚寥廓。素手
飞觞，钗头笑取，金英满浮桑落。鬓云慢约。
酒红拂破香腮薄。细细酌。帘外任教、月转画
阑角。


当年快意登临，异乡节物，难禁离索。故
人远、凌波何在，惟有残英共寂寞。愁到断肠
无处著。寄寒香与，凭渠问讯佳时，弄粉吹花，
为谁梳掠。

念奴娇

江城春晚，正海棠临水，嫣然幽独。秀色
天姿真富贵，何必金盘华屋。月下无人，雨中有
泪，绝艳仍清淑。丰肌得酒，嫩红微透轻縠。

晓日雾霭林深，佳人春睡思，朦胧初足。
笑出疏篱，端可厌，桃李漫山粗俗。衔子飞来，
鸿鹄何在，千里移西蜀。明朝酒醒，乱红那忍
轻触。

— 怨 —



洞仙歌

相如当日，曾奏凌云赋。落笔纵横妙风雨。
记扬鞭辇路，同醉金明，穷胜赏，不管重城已暮。

旧游如梦觉，零落朋侪，遗墨淋漓尚如故。
况神洲北望，今已丘墟，伤白璧、久埋黄土。
但空似、灵光岿然存，怅朗月清风，更无玄度。

临江仙

后院短墙临绿水，春风急管繁弦。问谁亲
按小婵娟。玉堂真学士，琳馆地行仙。

安得此身来此处，依稀一梦梨园。江南刺史谩垂涎。
据鞍肠已断，何况到尊前。

菩萨蛮

山光冷浸清溪底。溪光直到柴门里。卧对
白萍洲。敲眠数钓舟。

溪山无限好。恨不相逢早。老病独醒多。

— 四 —



如此良夜何。

谒金门

风淅沥。窗外雪花初积。梦破小窗人寂寂。
寒威无处敌。


强起饮君涓滴。清泪醉来沾臆。岐路即今
多拥隔。弟兄无信息。

品令

纹漪涨绿。疏霭连孤鹜。一年春事，柳飞
轻絮，筍添新竹。寂寞幽花，独殿小园嫩绿。

登临未足。怅游子、归期促。他年清梦千
里，犹到城阴溪曲。应有凌波，时为故人凝目。

以上见《乐府雅词》卷下。



吴则礼

秦楼月 送别

怅离阁。淮南三度梅花发。梅花发。片帆西去，落英如雪。

新秦古塞人华发。一樽别酒君听说。君听说。胡笳征雁，陇云沙月。

江楼令 晚眺

凭栏试觅红楼句，听考考、城头暮鼓。数骑翩翩度孤戍。尽雕弓白羽。

平生正被儒冠误。待闲看、将军射虎。朱槛潇潇过微雨。送斜阳西去。

虞美人 对菊

真香秀色盈盈女。一笑重阳雨。不应解怯晚丛寒。眼底轻罗小扇、且团团。

吴云楚雁浑依旧。更把金英嗅。鲜鲜未恨

— 圖 —



出闺迟。自许平生孤韵、与秋期。

又 送晁适道

夜寒闲倚西楼月。消尽江南雪。东风明日
木兰船。想见阳关声彻、雁连天。

斜斜洲渚溶溶水。端负青春醉。平安小字
几时回。空有暗香疏影、陇头梅。

又 泛舟东下

从来强作游秦计。只有貂裘敝。休论范叔
十年寒。看取星星种种、坐儒冠。


江湖旧日渔竿手。初把黄花酒。且凭洛水
送归船。想见淮南秋尽、水如天。

又 寄济川

乌皮白礪西窗暖。种种霜毛短。小春何处
有梅花。想见水边篱落、数枝斜。

殊方他日登楼句。好在孤吟处。五年拚落
醉魂中。试觅酒垆陈迹、问黄公。

— 员 袁 —



减字木兰花 寄田不伐

星星素发。只有鸣笳楼上发。看舞胡姬。
带得平安探骑归。

故人渐老。只与虎头论墨妙。怀抱难开。
快遣披云一笑来。

又


梅花未彻。付与团团沙塞月。端欲捐书。
去乞君王丈二笏。

貂裘锦帽。盘马不甘青鬓老。底事偏奇。
细草平沙看打围。

又

河西春晚。独有柳条来入眼。塞外斜斜。
不道欺寒红杏花。

边笳初发。与唤团团沙塞月。雁响连天。
谁倚城头百尺栏。



又 寄真宁

团团璧月。今夜广寒真秀发。何处吹笙。
催得清霜满凤城。

淮南好梦。镜里星星还种种。犹记银床。
曾为凉州唤玉觞。

又

淮天不断。点缀南云秋几雁。白露沾衣。
始是银屏梦觉时。

别离怀抱。消得镜中青鬓老。小字能无。
烦寄平安一纸书。

又

斑斑小雨。初入高梧黄叶暮。又是重阳。
昨夜西风作许凉。

鲜鲜丛菊。只解凋人双鬓绿。试傍清尊。
分付幽香与断魂。

— 员缘 —

